

## GION DA LA FORTUNA

Suenter che Gion aveva servì set onns a ses patrun, ha el ditg a quel: “Signur, mes temp qua è ussa a fin. Jau vi turnar tar mia mamma. Ma dai mia paja!”

“Ti m’has servì fidai vlamain”, ha il patrun replitgà. “Tia paja vegn ad esser uschè gronda sco tes servetsch!” Ed el al ha dà in toc aur uschè grond sco il chau da Gion.

Gion ha enzuglià l’aur en ses faziel, ha prendì il fagot sin la goba ed è sa mess en viadi. Entant ch’el chaminava, è passà in chavalier tut cuntent.

“Ah”, ha Gion ditg dad aut, “quant bel èsi dad ir a chaval! Ti sesas sco sin ina sutga, na stgarpitschas betg, spargnas chalzers e vegns era anc vinavant pli spert.”

Il chavalier ha udì las lamentaziuns ed è sa fermà: “Uei Gion, ma pertge vas ti a pe?”

“Tge duai jau far?”, respunda Gion, “jau hai da purtar a chasa quest toc aur.”

“Sas tge”, ha il chavalier ditg, “nus barattain, jau ta dun mes chaval e ti ma das tes aur.”

“Da cor gugent”, ha Gion respundì, “ma be che ti sappias, el ha in vaira pais.” Il chavalier ha fatg in sigl giu dal chaval, ha prendì l’aur ed ha gidà Gion sin la sella. El al ha dà enta maun las mastrinas ed ha ditg: “Sche ti vuls ir al trot, stos ti be clamar: hü-hot.”

Gion era cuntent da pudair chavaltgar tras la cuntrada gist sco ch’i plascheva ad el. Suenter in

tempet ha el pensà, ch’i fiss forsa bel dad ir in toc al trot. El ha clamà “hü-hot” ed il chaval è sa mess a curre.

Ma oha, avant che Gion ha gè temp da pensar, è el crudà or da la sella ed è sa platgà en in foss.

Il chaval fiss scappà, sch’in pur ch’era gist per via cun ina vatga n’al avess betg franà.

Gion è stà si cun stenta e fadia ed ha ditg al pur: “Ir a sella n’è betg propi in grond daletg, oravant tut sin il dies d’in clepper sco quel. Jau na vegn mai pli ad ir a sella. Quant pli utila è vossa vatga. Ins po chaminar en tutta calma davos ella ed ella dat era anc latg, paintg e chaschiel.”

“Sche mia vatga ta plascha, pertge na barattain nus betg?” ha il pur proponì.

“D’accord”, ha Gion respundì tut intgantà. Il pur al ha surlaschà la vatga, ha fatg in sigl sin il chaval ed è svanì.

Gion è chaminà plaunet davos sia vatga ed è sa legrà da ses bun barat. El è arrivà tar in’ustaria. Da spir plaschair ha el mangià tut ses paun e spendì ils ultims raps per ina biera. Silsuenter è el chaminà vinavant, ma la chalira al fascheva adina dapli fadia. Gion suava ed aveva ina said naira.

“Jau vi mulscher mia vatga!” ha el ditg per sasez.

El ha rentà la vatga vi d’ina planta setga, e cunquai ch’el n’aveva nagina sadella ha el mess sia chapitscha suten. Ma tut sias fadias da mulscher la vatga n’han betg purtà fritg, betg in unic dagut è cumparì. E perquai ch’el era zunt

maladester, al ha la vatga finalmain dà ina chalzerada sin ses chau.

Gion è restà in vaira temp per terra, fin ch'in mazler è passà speravi cun in char. En quel aveva el in purschè. "Tge èsi cun tai?", ha il mazler dumandà Gion ed al ha gidà en pes. Gion ha raquintà tge ch'era capità. "Questa vatga qua na vegn betg pli a dar latg. Quella è bler memia veglia e serva il pli dal tut sco manadira u per far batgaria", ha il mazler ditg. "Ma tgi avess pensà quai? La charn-vatga na ma gusta tuttina betg. Sche jau avess be in portg giuven sco il Voss, alura pudess jau perfin far liongias." "Taidla, Gion", ha il mazler ditg, "per far in plaschair a tai, ta vi jau dar mes purschè per tia vatga." "Che Dieu As paja", ha Gion ditg, ha dà sia vatga e prendì il purschè. Gion ha cuntinuà ses viadi ed ha adina puspè pensà quanta fortuna ch'el haja gè fin ussa. Pauc suenter ha el inscuntrà in cumpogn che purtava sut bratsch ina bella auca alva. Gion ha cumenzà a raquintar da sia fortuna e co ch'el ha adina puspè pudì far fitg buns barats. Il cumpogn perencunter ludava sia auca e blagava quant greva ch'ella saja. "Era mes purschè ha in bel pais", ha Gion ditg. "El sumeglia però pulitamain il portg ch'è vegnì engulà ier dal mastral", ha remartgà il cumpogn cun tschera seriosa. "Fa atenziun e na ta lascha betg tschiffar, uschiglio ta mettani en praschun." "O Dieu", ha Gion ditg, "gida mai or da quest privel! Prenda ti mes purschè e dà a mai l'auca. "Quai è magari ristgà", ha il

giuvenot ditg, "ma jau na vi betg che ti vegnias en las griflas da quels sbirs." Ed il giuven ha prendì la suga ed è svanì spertamain cun il portg per ina senda zuppada.

"Il barat n'è betg stà mal", ha Gion pensà suenter ch'el è puspè sa mess en viadi. Arrivà en l'ultim vitg ha el inscuntrà in mulet. Sia roda girava ed el chantava:

*"Jau giz forschs e cuntels fitg gugent e ma driz sco la feglia tenor il vent."*

Gion è sa fermà ed ha ditg: "Vus essas sco para fitg cuntent cun Vossa lavur."

"Gea", ha il mulet respundì, "mia professiun è ina chava d'aur. Ed in dretg mulet ha era adina raps en giaglioffa. Ma schai, nua avais Vus cumprà questa bella auca?"

Gion ha raquintà l'istorgia da tut ses barats. "Vus avais adina gè in bun maun", ha il mulet respundì. "Ussa avais mo da dar adatg che vus hajas adina raps en giaglioffa."

"E co duess jau far quai?" ha Gion dumandà. "Vus stuais daventar mulet sco jau. I basta dad avair ina mola. Jau avess anc ina che jau na dovr betg. Sche vus ma dais l'auca, alura as dun jau la mola." Gian al ha dà l'auca ed ha prendì la mola. Il mulet al ha dà enta maun anc in grond crap ed ha ditg: "Qua avais vus anc in crap nizzaivel. Cun quel pudais Vus gulivar guttas tortas." Gion ha prendì crap e mola ed è i vinavant cun buna luna.

Ma bainbaud ha el cumenzà a vegnir stanchel e fom aveva el era. Sia

chargia era uschè greva ch'el stueva ruassar da temp en temp.

Finalmain è el arrivà tar in bigl. Precautamain ha el pusà giu ses crap e sia mola sin l'ur dal bigl. Ma cun sa sgobar per baiver aua, ha'l stumplà ses stgazis en il bigl. Cura che Gion als ha vis a svanir è el siglì en pes ed ha engrazià a Dieu ch'el al aveva deliberà da questa greva chargia. "Uchè cuntent sco jau n'è nagin auter sin quest mund", ha el clamà tut intgantà.

Cun cor lev e deliberà da mintga pais è el ì vinavant fin ch'el ha cuntanschì la chasa da sia mamma.